

特 載

中山縣縣長唐紹儀就職宣言

當十八年四月訓政實施委員會成立之始，紹儀與同人等曾舉四事與諸父老昆季諸姑姊妹相勗，荏苒兩載，心長力短，負疚滋多，今者 省政府依 國民政府修正中山縣訓政實施委員會組織大綱第六條之規定，以紹儀兼任縣長，既負指導之責，復當執行之衝，紹儀不才，前此雖服務中外，未嘗對於桑梓略表敬恭之誼，引以為恨，縣長一職，號為親民之官，古重其選，漢代進退縣令，以戶口、墾田、錢穀出入、盜賊多少、為標準，蓋以興利除弊，化民成俗，責之縣令，而不以催科為能事，卓茂出為縣令，入為三公，史冊以為盛事，紹儀何人，敢擬前賢，竊願以虛心誠意，容納邑人之盡言，不執私見，不近貪人，度支務期公開，庶政廣徵輿論，不侮鰥寡，不怙強豪，破除官尊民卑，深居簡出之習，稍有餘暇，必周歷全縣各鄉，與邑人相見，邑人之疾苦，即紹儀之疾苦，倘邑人之疾苦，一日未解除，即紹儀一日難安寢饋，惟模範縣之工作，至為重要，集思乃能廣益，羣力方可有成，所願邑人視邑事如家事，視紹儀如公僕，憫其迂拙，樂與扶持，智者竭其謀，能者竭其力，而毋以乾法徇私之事相干，使紹儀得以全力盡瘁邑事，苟有裨於毫髮，雖糜頂踵以奚辭，此紹儀願與邑人相勗者一也，建設之要，首推民生，衣食住行，民生所賴，將如何發展農業，調節盈虛，以足民食，如何宏闢工廠，廣事織造，以裕民衣，如何修築各式廬舍，以樂民居，如何興治道路，以利民行，皆當期以時日，非一蹴

可辦之事，本邑近年開公路多處，於民行一端，已稍具規模，其他三項，尙待逐漸進行，今後當與邑人共同致力，此紹儀願與邑人相勗者二也，辦理自衛，爲地方自治要政，必須與清查戶口，測量土地，相輔而行，所願邑人各本愛國愛鄉之心，與縣府通力合作，以次施行，更有進者，維持治安，本警察縣兵保安隊之責，然必官民協力，身臂相資，守望相助，方免疏虞，未可偏賴官力，忽視自衛之重要，此紹儀願與邑人共勗者三也，財政爲建設之命脈，銖毫皆同胞之膏血，一方既不能因噎廢食，使建設要政，或有稽遲，一方又當熟權民力，善培稅源，至於舊有事業之整理，未來事業之統籌，皆當官民合作，躍踴趨事，使利歸民衆，欺不虛糜，此紹儀願與邑人相勗者四也，本邑教育，雖稱較爲進步，然缺點尙多，當知學說紛歧，須折衷於黨義，諸科並進，以實用爲目標，苟無愛種愛國之心，試驗實施之力，浮華鮮實，一身且無依歸，黨國何所依賴，本邑學產，不患不能自給，而患主持之不盡得人，不患無師資，而患延攬之未當，至於學校設施，尤當酌鄉土之利病，視財力之豐嗇，毋習奢侈，毋染囂張，恥學問不若人，以黨國爲己任，青年學生之責也，循循善誘，身爲模楷，視學校如家庭，待學生如子弟，教職員之責也，倘能如此，更何學潮之足慮乎，此紹儀願與邑人相勗者五也，今日爲紹儀受職之始，蒙

監督委員

黨政各機關代表，或編訓言，或賜箴規，獎飾有加，謹竭至誠，敬謹接授，誓當恪遵總理遺教，依法定職權，本平生之微志，努力從事，不敢稍懈，庶以稍慰總理在天之靈，及

國府省府之期望，邦人諸友，幸有以教之，謹此宣言，

中華民國二十年三月

十六

日